

Headlines

1. प्रधानमंत्री नरेंद्र मोदी होरें आखेआ जे शैहरी चुनौती कोष यानि यू.सी.एफ गी केंद्री मंत्रीमंडल आसेआ इक लक्ख करोड़ रुपे दी मंजूरी कन्नै उच्चे म्यार आले शैहरी बुनियादी ढांचे उपलब्ध होइन्न।
2. भद्रवाह-बसोहली राश्ट्री जरनैली शिड़कै गी हाल च होई दी बर्फबारी दे बाद परतियै खोलेआ गेआ।
3. महाशिवरात्रि दा त्यौहार पूरे जम्मू खित्ते च धार्मिक उत्साह ते श्रद्धाभाव कन्नै मनाया जा'रदा ऐ।
4. टी-20 विश्व कप दे महत्वपूर्ण मैच च अज्ज भारत दा मुकाबला पाकिस्तान कन्नै होने कारण मुल्खै भरै च उत्साह बने दा ऐ।
5. मौसम विभाग नै औंदी 17 फरवरी गी किश उच्चियें धारें पर हौली बर्फबारी होने दी पेशगोई कीती ऐ।

PM-UCF

प्रधानमंत्री नरेन्द्र मोदी होरें इक लक्ख करोड़ रुपे दे शैहरी चुनौती कोष- यूसीएफ गी मंजूरी दिते जाने दी केन्द्रीय मंत्रिमंडल दी सराहना कीती ऐ। इक सोशल मीडिया पोस्ट च मोदी होरें आखेआ जे एह कोष उच्च गुणवत्ता दी शैहरी अवसंरचना प्रदान करने आस्तै बाजार वित्त, निजी भागीदारी ते नागरिक केंद्रित सुधारें दा लाह ठोआग। उने आखेआ जे एह पैहल शहरें गी देशे दी आर्थिक वृद्धि दा मुख प्रेरक बनग। शैहरी चुनौती कोष- यूसीएफ गृह ते शैहरी मामलें दे मंत्रालय दी इक केंद्र प्रायोजित संयुक्त योजना ऐ। इस कोष दा मकसद लचीले, उत्पादक, समावेशी ते जलवायु प्रति संवेदनशील शैहरें दा निर्माण करना ऐ।



Bhaderwah Basohli NHW

इक्क रक्षाउ प्रवक्ता नै दस्सेआ जे खराब मौसम बावजूद इक बड़े गै तेज ते आपसी तालमेल कन्नै चलाए गेदे अभियान च सीमा सड़क संगठन-बीआरओ नै अज्ज रणनीतिक तौरा पर महत्वै आहली भद्रवाह-बनी बसोहली राश्ट्री जरनैली शिड़क गी गड्डियें दी आओजाई लेई परतियै खोली दित्ता ऐ। इस करियै जम्मू-कश्मीर दे डोडा ते कठुआ जिलें बश्कार संपर्क बहाल होई गेआ ऐ। प्रवक्ता नै दस्सेआ जे छत्रगला कश हाल च गै होई दी मती बर्फबारी नै 65 किलोमीटर इलाके च गड्डियें दी आओजाई च रूकावट पाई ही जिस करियै पहाड़ी इलाकें बश्कार जरूरी राबता किश चिरै आस्तै टुट्टी गेआ हा। उनें गलाया जे अभियान सरबंधी तैयारियें ते हर मौसम च राबता बनाए रखने दे अपने बादे मताबक बीआरओ नै प्रोजेक्ट संपर्क तैहत सरहदी शिड़कें सरबंधी बल 35-बी.आर.टी.एफ दी 69 ते 118 रोड कंस्ट्रक्शन कंपनी आर.सी.सी नै आशापति ग्लेशियर ते कैलाश पर्वत कश मुश्कल इलाकें च बर्फ हटाने दा इक बड्डा अभियान रम्भ कीता ऐ।

<><><><><><>

Mahashivratri

महाशिवरात्री दा त्यौहार जम्मू खित्ते दे बक्ख-बक्ख मंदरें ते तीर्थ स्थानें च बड़े उत्साह ते धार्मिक श्रद्धा कन्नै मनाया जा'रदा ऐ। बड्डलै सवेलै थमां गै बडी मती गिनतरी च श्रद्धालुएं मंदरै च जाइयै मत्था टेकेआ ते शिवें दा अशीर्वाद लैता। तोआई, उधमपुर जिले च भगवान शिव गी समर्पित मंदरै च श्रद्धालुएं दी बडी मती भीड़ दिक्खने गी लब्बी।

तोआई, साम्बा जिले च बी महाशिवरात्रि दा त्यौहार बड़े उत्साह ते धार्मिक श्रद्धा कन्नै मनाया गेआ।

इस्सै चाल्ली एहू पवित्तर त्यौहार रियासी जिले दे केई हिस्सें च मनाया गेआ। मुख्क समारोह रियासी दे आप शम्भू महादेव मंदर च होआ।

जम्मू खित्ते दे होरनें हिस्सें आला लेखा बन्ने आले जिले पुंछ च बी शिवरात्रि बड़े मते उत्साह कन्नै मनाई गेई।

<><><><><><>

Innovation-JU

जम्मू यूनिवर्सिटी दा कौशल कन्नै सरबंधत केंद्र SII EDC कल संगारै 16 ते 17 फरवरी गी द'ऊं दिनी राश्ट्री सतह दा हैकाथॉन इनोवेशन-1 दा सरिस्ता करा करदा ऐ। इस कार्जक्रम दा मकसद विद्यार्थियें बशकार नमियें काड़ें ते उद्यमिता गी बढावा देना ऐ। एह कार्जक्रम पूरी रात चलोग ते एहदे च विद्यार्थी इनोवेटर्स, मेंटर्स ते बंज बपार कन्नै सरबंधत लोक इक्के मंच पर किट्टै होडन तां जे नमियें काड़ें ते उद्यमिता कन्नै जुडी दियें दिक्कतें-परेशानियें गी दूर कीता जाई सकै।



India Pak-T 20

आई.सी.सी टी-20 विश्व कप च अज्ज दा दिन बड़ा गै खास होने आह्लाऐ कीजे अज्ज भारत ते पाकिस्तान बशकार मैच खेड्डेआ जाना ऐं एह मैच भारती समें मताबक शामी लै 7 बजे श्रीलंका दे कोलम्बो शैहर च खेड्डेआ जाह्ग। इक-दुए दे रिवायती हरीफ भारत ते पाकिस्तान प्रतियोगिता च अजें धोड़ी दो-दो मुकाबले जित्तियै 4-4 अंक हासल करी चुके दे न। मुल्ख भरै आडर लेखै गै जम्मू च बी इस मैच गी लेइयै लोकें च खासा उत्साह दिक्खेआ जा करदा ऐ। खास करियै नौजवान बच्चे इस मैच दा बेसब्री कन्नै इंतजार करा'रदे न ते भारती टीम दा पूरा समर्थन देआ'रदे न। समर्थन दे इक अनोखे प्रदर्शन च इक युवा प्रशंसक गी टीम इंडिया दी हौसलाफजाई करने आस्तै गिटार बजांदे ते गाना गांदे दिक्खेआ गेआ। जम्मू च क्रिकेट प्रेमियें भरोसा जताया ऐ जे टीम इंडिया अज्ज आले मैच च मजबूत ते शानदार प्रदर्शन करोग।



Radio Kisan Diwas

आकाशवाणी जम्मू नै अज्ज अपने परिसर च रेडियो किसान दिवस बड़े जोशो-खरोश कन्नै मनाया। इस मौके पर इक कार्यक्रम दा बी आयोजन कीता गेआ जेह्दे च प्रगतिशील करसानें, कृषि माहिरें ते मुतल्लका मैहकमे दे अधिकारियें बड़े मते उत्साह कन्नै हिस्सा लैता। किट्ट गी संबोधित करदे होई आकाशवाणी जम्मू दे डीडीजी इंजीनियरिंग रविकांत बाबू होरें राईबाई सरबंधी अज्जै-कल्लै दिएं तकनीकें गी अपनाने दे महत्व पर जोर पाया। कृषि विज्ञान केंद्र साम्बा दे प्रभारी डॉ. संजय खजुरिया होरें विज्ञान केंद्र आसेआ चलाई जा'रदी बक्ख-बक्ख पैहलकदमियें बारे तफसीली जानकारी दिती। इस मौके पर आकाशवाणी जम्मू दे असिस्टेंट डरैक्टर प्रोग्राम बचन लाल होर बी उत्थे मौजूद हे। उनें इस गल्लै दा यकीन दोआया जे आकाशवाणी जम्मू अपने

बक्ख-बक्ख प्रोग्रामें राहें समें-समें पर भरोसेमंद ते करसानें पर केंद्रित जानकारी दा प्रसार करना जारी रक्खोग।

<><><><><><>

DIC-Ramban

जिला उद्योग केंद्र रामबन आसेआ जिले च बक्ख-बक्ख सरकारी औद्योगिक सिखलाई संस्थानें च जागरूकता कैंपें ते कार्यशालाएं दा आयोजन कीता जा'रदा ऐ। कार्यशालाएं दरान मकामी लोकें गी RAMP/ PMEGP स्कीम पी.एम श्विकर्मा ते जिला उद्योग केंद्र रामबन राहें लागू कीती जा'रदी बक्ख-बक्ख जानकारी दिती गई। एह्दे अलावा बेरोजगार नौजोआनें गी PMEGP स्कीम तैहत अपना कारोबार शुरू करने लेई उपलब्ध फायदें बारै बी जानकार बनाया गेआ। इन्ना गै नेई इस दरान जम्मू-कश्मीर औद्योगिक नीति तैहत उपलब्ध फायदें बारै बी लोकें गी दस्सेआ-दसाया गेआ।

<><><><><><>

Weather

मौसम विभाग नै औंदी 17 फरवरी गी जम्मू-कश्मीर दे उप्परले इलाके च हल्की बर्फबारी दी पेशनगोई कीती ऐ। उआं एह्दे अलावा 25 फरवरी तगर पूरे केंद्र शासित प्रदेश च मौसम आमतौरा पर खुशक रौहने दी तवक्को दस्सी गेदी ऐ। मकामी लोकें ते सफर करने आह्लें गी सौहगा कीता गेदा ऐ जे ओहू मौसम बारै जारी जानकारी ते पेशगोई गी ध्यानै च रखदे होई गै सफर पर निकलन।

<><><><><><>